

ظفر پرواز کا کہوار ناول انگریستانو

پون غوسيو تياري

چھترارو ای دیہہ، دیہا ای جوان، نام ہتوغو لنگر آباد۔ ہسے نامو قولہ لنگر آباد۔ بو مراتاب دوروینی۔ زارو نان تت زندہ۔ دوری روئے والی، شالہ ٹپ مالداری۔ خمبختین خوراک درست، یورانوتے بیٹی پرانی دی بہچور۔ تت جام زمیندار، نان دی مدیری دار۔ استانہ ژانگ موشینو پراشال۔ نیشیکو بائیپاش، بائیپاشو نخی قالین ژائے پیلیسک۔ ای کما ویخیکان ویروم کپ کوری ای گوچہ لکھی شینی۔ سوری دیکو نوغ تخت، بیندی پیلیسک۔ ٹیکہ لوٹ کارین چیدین، نسا یارکندی چائے جوش، پھوستو قاب دان ہتے اندرینو اوروسی اوچے شوربہ خوری پیالہ۔ شومو کہانجتو روپھئے درونگ قڑینسار، نسہ پھوک باردوخ اوچے واژ۔ فروسکیو نخو کہانجا اوروسی پولتائی، کہمار کیسہ اوچے زوڑے۔ ہتے موژا دار تاوین، تاوینو ای کما گز سن کفن غار، تھویکو ویز موکا، موکو قالب، پھوک بزیز نسو وا پالوم غیاروم۔ نمیشینی نھا تونیشیری نمیشینی بیلینجی شیر۔ شارداغیزو نسا ای کما موشٹاک کمبوژ، باریکی تریز نیزی چھانجا چکیٹکو بچین تیار۔ بائیپاشو سوم چوکی راتھینی۔ بتوشومہ ٹپ دارانو۔ ٹیکی غان، تھاشو، پانوس، لنگری، پتھاخ، براغینینی، تھالوو، اوغینی اژوک، اوغ پیئنی ٹونج وا کور غیاروم چوو چھامیژین اوچے اشلیمیان ٹیکھین لاکھی شینی۔ ای وشکی کپھینی بیڑا ٹپ کپھینی۔ نخی دارژینی، سورتو موژتو کھونو، موژی پیلیسک۔ ویروموچے سوری دیکو تخت بیلینجی شینی۔ ٹیکا ایہہ نسی شیوکاژ۔ ہتے تھیسوم اژیرو چھانجان ماژ۔ کیہ وخت اژیرو باچھوژ دی سورو یئی نیزیر۔ بیندا چاخور، تھسوروک خھتری دیتی شیر۔ نسہ وارکھیٹہ پوشپ۔ نشیکوتے وارانگ بیلینجی شیر۔ دھلینخو گوچتو پھوپھوک چھانجان خوراکہ وا کروٹو دار درے شینی۔

لنگر آباد زمیندارو سوم جستہ جام بایو غیردی۔ دیہا بو موژارا۔ وخت وختا دیہو رویانتے چشت دوئے۔ یار باش، ملگیریان سوم نشیک روپھیک شیر۔ تتو عمرو رویانے قدر کوئے۔ گرامبیشانان محتاجیار نیزیر۔ سالہ ای مکالا دورو ساوزیئرو اشناریان گنی دودیری سودا بیر۔ اچی دورو ضرورتو اشناریان گنی گوئے۔ دورو روئے پورا سال قالین، پیلیسک، شو، شوقہ، بنیان، ژاراپ، کوری لاکھونی۔ لنگر آباد تان ضرورتا بیش بیرو شوروچے ویز موکان دی بیزیمیر۔ دورو کوموران زوپ سویئرو کھوئی، سوربند، چاکو ہانو، اخلینی ہانو، سرمو خلتہ، وا ہموش قسمو اشناری ہوروتے دونی۔ ہمیتان دیتی بیتانتے کھوئی سوئینی شونج، تکی دینی، اسکیم، شوتور، وا خور ضرورتو اشناری انگوئے۔ خیشیق دی ای گان جوگان کھومون ہے موژی دونی۔ ہتیتان تان فرمائش ہونی۔ دیہو روئے دو کیہ وخت تان پھوک بیزیمیکو اشناریان ہوروتے دونی۔ بیہ سفر کافی درونگار ہوئے۔ ہورو تیاری ای مس پروشی شروع ہوئے۔

دورو کورمان بڑا خھئے ای انوس لنگر آباد سفروت ارادہ اریر۔ دوری ضرورتو اشناریان بارا بشار اریر۔ جو گرامبیشان دی ہتوغو سوم سفروتے ملگیری ہونی۔ ای لنگر آبادو دوست وشلی، تان پھوک سامانان بیزیمیکو، وا ای گرامبیشو لنگر آبادو سوم باردویو بیٹی تیار ہوئے کہ پونگو پورغونج گنی تانتے کیاغ سودا کوم رے۔ سفرو تیاری شروع ہوئے۔ سوت بسو موژی سفر نسیکو نیت ہوئے۔ خیق سولوٹو سف ای بیٹی سفرو سامونان کوریک شروع ارینی۔ خورجینان مرمت ارینی، گوردوغو لتان زوندیتانی۔ لنگر آباد کھونانتے نوغ تلے، موژو تورتور چکھیتائے۔ شونج، خھونخور، براژ اوچے غوچو شانگاشیو لکھیتائے۔ نان شوان یئی نیئی بار بار ڈیشٹ دیاو کپ اریر۔